

Bienestar di trahadó ta kos serio:

Klaridat tokante Curoil Bonaire

K R A L E N D I J K - ABVO ta un sindikato respetá i komo tal nunca nos no ta rebaha na e nivel di tira ku lodo. Otro sindikato ku táktikanan kuestionabel a hasi uso di nos norma i balor pa ataka. Nos ta respetá nos miembronan i komo tal nos ta urgi kada persona pa wak i analisá kada situashon laboral ku kabes friu.

Den komunidad boneriano tin rumornan tokante negosiashonnan di Kontrato Kolektivo (CAO) ku e kompania Curoil Bonaire. Rumornan ku a planta ku mal intenshon, p'esei ABVO pa medio di e komunikado di prensa aki, ta splika komunidad e situashon real.

E CAO di Curoil Bonaire ta praktikamente kla. Falta solamente e punto konserní

bónus pa finalisá esaki. No tin niun klase di lógika pa desafilía di ABVO mirando ku falta solamente un punto pa konkretisá. Si nos a negoshá kasi tur punto den e CAO, kiko ta e motibu pa hala 'tras riba un punto'?

Lamentablemente nos tin ku konstatá na anja 2023 ku sierto sindikato ta usa e práktika di kibra otro sindikato. Kon otro nos por sp-

lika e echo ku e 'shopsteward' ku a tuma parti den tur seshon di negosiashon ku Curoil awor ke kore bai otro sindikato? E pregunta ta surgi, kiko e otro sindikato a ofresé e shopsteward aki?

A hasi uso di nos serie-dat i integridat komo sindikato pa por infiltrá i usa polítika barata. Pero ABVO ta garantisá kada miem-

bro i komunidad kompleto ku nos nunca lo desviá di nos mishon. "ABVO ta un sindikato ideológiko ku su meta ta pa traha pa progreso di su miembro i nan familia. Tambe pa e sosiedat en partikular."

Pa e motibu aki nos ta keda den negosiashon ku Curoil Bonaire. Mester ta bon kla ku ABVO no ta para negosiashon ku Curoil!

Na opinion di Robert Swinkels:

"No por hunga ku bida di hende"

K R A L E N D I J K - "No por hunga ku bida di hende". Esaki na opinion di Robert Swinkels, siudadano krítiko, ku no ta basilá pa ora ta nesesario laga su bos resoná, entre otro pa kosnan ku no ta kana bon den sektor di kuido.

Robert Swinkels ta referí na un kaso ku a pasa resien, meskos ku loke e mes a eksperensiá: "Un kabayero

ta sinti malu i ta wòrdu mandá spesialisista dor di su dòkter di kas. E spesialisista ta mand'é hasi tèst. E resultado e tta bai haña te despues di 3 òf 4 siman. E persona ta bai eksterior i ta bira malu. E ta bai spesialisista aya i ta hasi tèstnan i e ta haña resultado mesora. Nada di warda hopi manera aki."

Regresando Boneiru

e persona ta bai su sita na hospital. E no ta haña ta na nodi pa duna e spesialisista e resultado di eksterior, pasobra e ta pensa ku aki lo ta meskos. Grandi ta su sorpresa ora e spesialisista aki ta bis'é ku tur kos ta bon.

Swinkels: "Buskando su derecho e ta konfrontá e spesialisista ku e resultado di eksterior. E spesialisista ta keda sorprendí ku e resultado ta otro fo'i su diagnósis. Pregunta kardinal ta ku si nos ekiponan ta na nivel pa por detektá malesanan na tempu? Tin konsulta interkolegial ta tuma lugá? Kiko e 'second opinion' ta? Kiko ta hasi kuné? Nos ta hunga ku bida di hende si un spesialisista no por detektá un malesa na tempu i aktua mas rápido posibel."

Robert Swinkels ta puntra ken ta responsabel pa e ekipo? "Mariadal, Hulanda, OLB, zvk? No por drumi warda mas hende bira malu i muri. Pa nos komo pashènt e asunto aki ta mas importante ku papia tokante ken si i ken no ta bin buska remedi."

Programanan interesante awe na Bonaire.tv

K R A L E N D I J K - Pa awe djaluna tin algun programa interesante na Bonaire.tv, kuminsando pa 12'or di mèrdia ku un 'Aktualidat' den kua invitado ta Cherrel Kwidama, presidente di federashon sindikal AFBW. Mas aleu tin un Herensia di Aruba ku Diana Antonette i un 'Aki Boneiru' ku pastor Marc Hooijschuur, stashoná na parokia di Coromoto na Antriol.

Nathaly Evertsz ta kombersá ku Kwidama tokante AFBW i diferente desaroyo riba tereno sindikal. Ta parse manera tin un 'guera' den arena sindikal di Boneiru. AFBW ta konkistando tereno pisá a kosto di ABVO. Tópiko

entre otro ku ta bini dilanti.

Den Herensia pa 8'or di anochi Diana Lydia Antonette di Aruba ta papia di su bida i karera, ku ta hopi konsentrá riba baile.

Pa 9'or mesun anochi aki Velli Gijsbertha ta entrevistá pastor Marc Hooijschuur aki un 'Aki Boneiru'. Motibu ta e echo ku el a kaba di selebrá su 25 aniversario di saserdosio.



REUNION KONSEHO INSULAR (BVR)

Djiamars 11 di yüli 2023 pa 19:00 or ta tuma lugá un reunion públiko èkstra (besluitvormende raad) di Konseho Insular den sala di reunion Piet Mondriaan di Courtyard by Marriott.

Agènda

1. Apertura/partisipashon;
2. Ora pa hasi pregunta;
3. Oportunidat pa suidadano hiba palabra;
4. Dokumentunan ku a drenta;
5. Stipulashon di agènda;
6. Aprobashon kuenta anual Entidat Públiko Boneiru 2022;
7. Proposishon di repartishon kuenta anual positivo 2022;
8. Klousura.

Ta invitá Kolegio Ehekutivo.

Ta publiká e konvokashon akí riba e parti públiko di e sistema di informashon di Konseho Insular (www.konsehoinsular.com). Te asina leu ku ta aplikabel, e dokumentonan konserní manera kustumber ta na Grefi na disposishon. Ta transmití e reunion akí live riba TV, página di Facebook i Youtube di Konseho Insular.

R. Oleana
Presidente